

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 425715 22 St
Tuzla, 12.03.2026. godine

Općinski sud u Tuzli, stečajni sudija Vedran Milašinović, u stečajnom postupku nad stečajnim dužnikom "FINISH PROFILES" d.o.o. za proizvodnju, trgovinu i usluge Gradačac, Ledenice Donje bb, sa podružnicom "FINISH PROFILES" d.o.o. za proizvodnju, trgovinu i usluge Gradačac, Podružnica Pelagićevo, Donje Ledenice b.b., Pelagićevo, van ročišta, donio je dana 12.03.2026. godine sljedeće:

RJEŠENJE

OTVARA SE stečajni postupak nad imovinom dužnika "FINISH PROFILES" d.o.o. za proizvodnju, trgovinu i usluge Gradačac, Ledenice Donje bb, sa podružnicom "FINISH PROFILES" d.o.o. za proizvodnju, trgovinu i usluge Gradačac, Podružnica Pelagićevo, Donje Ledenice b.b., Pelagićevo, matični broj subjekta 32-01-0291-10, JIB: 4209992410001, račun broj; 571040000079007 otvoren kod Poštanska štedionica a.d. banja Luka.

Za stečajnog upravnika imenuje se Emir Mehurić iz Gračanice.

ZAKLJUČUJE SE stečajni postupak nad imovinom dužnika "FINISH PROFILES" d.o.o. za proizvodnju, trgovinu i usluge Gradačac, Ledenice Donje bb, sa podružnicom "FINISH PROFILES" d.o.o. za proizvodnju, trgovinu i usluge Gradačac, Podružnica Pelagićevo, Donje Ledenice b.b., Pelagićevo, zbog nedostatka stečajne mase za pokriće troškova stečajnog postupka.

Rješenje će se objaviti na oglasnoj tabli suda, web stranici suda, Službenim novinama F BiH, te dostaviti FIA.

Pravne posljedice zaključenja stečajnog postupka nastupit će po proteku osam dana od dana objavljivanja rješenja u „Službenim novinama F BiH“, a pravosnažno rješenje će se dostaviti Odjelenju registra ovog suda, radi brisanja stečajnog dužnika iz sudskog registra.

Obrazloženje

Rješenjem Općinskog suda u Tuzli broj: 32 0 St 425715 22 St od 20.09.2022. godine, pokrenut je prethodni postupak radi utvrđivanja uslova za otvaranje stečajnog postupka nad imovinom društva "FINISH PROFILES" d.o.o. za proizvodnju, trgovinu i usluge Gradačac, Ledenice Donje bb, sa podružnicom "FINISH PROFILES" d.o.o. za proizvodnju, trgovinu i usluge Gradačac, Podružnica Pelagićevo, Donje Ledenice b.b., Pelagićevo, a za privremenog stečajnog upravnika imenovan je Emir Mehurić iz Gračanice, sve temeljem odredaba člana 61 Zakona o stečaju (Sl. novine F BiH 53/21).

Iz izvještaja privremenog stečajnog upravnika i druge dokumentacije u spisu proizilazi da su računi dužnika blokirani duži vremenski period (glavni račun blokirani u kontinuitetu od 21.03.2018. godine), da društvo ne obavlja djelatnost nekoliko godina. Jedini uposlenik društva je Denis Inkić – direktor. U svom vlasništvu društvo je imalo nepokretnost – poslovnu halu sagrađenu na nekretnini označenoj kao k.č. broj 346/1, poslovna zgrada (1) površine 1.800 m², oranica/njiva 3 klase u površini od 1.159 m² ukupne površine 2.959 m², upisana u zk uložak broj 32 k.o. Donje Ledenice – dio, koja nekretnina je upisana u pl broj 1200 k.o. Donje Ledenice. U bilansima društva je evidentirano da društvo ima obaveze u iznosu od 3.144.470,00 KM, a potraživanja u iznosu od 2.578.722,00 KM, s tim da zbog nepotpunosti finansijske dokumentacije nije bilo moguće utvrditi tačne periode nastanka obaveza i potraživanja, niti osnove i dužnike, a nije utvrđeno da društvo ima drugu imovinu. Privremeni stečajni upravnik je u izvještaju dao zaključak da je prijedlog za otvaranje stečaja dopušten i osnovan, da postoji

platežna nesposobnost, da nije za očekivati da bi se poslovna aktivnost mogla nastaviti, s tim da bi zbog stanja i imovine za otvaranje stečajnog postupka bilo potrebno uplatiti dodatni iznos od 7.000,00 KM na ime predujma troškova.

Na ročištu za raspravljanje o izvještaju o provedenom prethodnom postupku su priložena dva e-maila računovodstvenog servisa Efektiva Tuzla, iz kojih je vidljivo da se u prilogu dostavljaju knjigovodstveni bilansi, a u e-mailu se navodi da su se analitička knjižena kuf i kif desila u 2018. godini, a da računovodstveni servis ne raspolaže tom dokumentacijom. Punomoćnik stečajnog dužnika je na ročištu naveo da sve i da postoje neka potraživanja prema trećim licima, da bi ona datirala najkasnije iz 2018. godine i da su već zastarjela, dok je punomoćnik predlagača istakao da prihvata izvještaj priv. st. upravnika u pogledu uslova za otvaranje stečaja na šta nema uticaja nepotpunost u pogledu potraživanja koja nije uzrokovana razlozima na strani priv. st. upravnika.

U periodu sačinjavanja izvještaja privremenog stečajnog upravnika i ročišta radi raspravljanja o istom je u toku bio žalbeni postupak po izjavljenoj žalbi protiv rješenja o dosudi Općinskog suda u Gradačcu broj 28 0 Ip 071128 19 Ip od 17.03.2022. godine i rješenja o namirenju od 29.04.2022. godine. Naime, rješenjem o dosudi su u izvršnom postupku dosuđene nepokretnosti u vlasništvu stečajnog dužnika i to k.č. broj 346/1 (poslovna zgrada) i oranica ukupne površine 2.959 m² (koju je konstatovao i priv. st. upravnik u izvještaju) i k.č. broj 344 oranica površine 1.134 m², a koje su dosuđene licu Mate Bagić kao kupcu, a na koje rješenje je izjavio žalbu "FINISH PROFILES" BV IJsendijkstraat 383, 1422 LB Purmerend, Kraljevina Nizozemska i još jedan učesnik u tom izvršnom postupku.

Međutim, u daljem toku postupka u stečajni spis je priloženo rješenje Kantonalnog suda u Tuzli broj 28 0 Ip 071128 22 Pž od 14.12.2023. godine kojim je odbijena žalba protiv rješenja o dosudi i rješenja o namirenju. S obzirom na navedeno, pravosnažnošću rješenja o dosudi pomenute nepokretnosti su prestale biti vlasništvo stečajnog dužnika, tako da ne bi mogle ući u stečajnu masu u ovom postupku.

Dakle, sud nalazi da podnosilac prijedloga za otvaranje stečajnog postupka nije podnio prijedlog u roku od 60 dana od dana nastupanja platežne nesposobnosti, tačnije glavni račun je blokiran od 21.03.2018. godine a prijedlog nije podnio stečajni dužnik već povjerilac, da postoji stečajni razlog za otvaranje stečajni postupka predviđen članom 6 stav 2 i članom 102 Zakona o stečaju.

U smislu odredbe člana 103 stav 1 Zakona o stečaju, a u vezi sa odredbom člana 102 stav 7 Zakona o stečaju F BiH, a budući da iz rezultata postupka nije utvrđeno da dužnik raspolaže sredstvima za vođenje stečajnog postupka iz kojih bi se mogli podmiriti troškovi stečajnog postupka, sud je rješenjem od 20.08.2025. godine pozvao predlagača, povjerioce i sva zainteresovana lica da u roku od 30 dana od dana objavljivanja poziva u službenim novinama uplate iznos od 7.000,00 KM na ime otvaranja stečajnog postupka, iz kojeg predujmljenog iznosa bi se pokrili troškovi stečajnog postupka.

Rješenje kojim se pozivaju predlagač, povjerioci i sva zainteresovana lica, objavljeno je u Službenim novinama F BiH broj 67/25 dana 03.09.2025. godine, oglasnoj tabli suda dana 21.08.2025. godine i na web stranici suda, kojim se objavama javni poziv smatra dostavljenim.

S obzirom da u ostavljenom roku koji je propisan zakonom predlagač, povjerioci ili neko od zainteresovanih lica nisu izvršili uplatu predujma za obezbjeđenje troškova stečajnog postupka, sud je u smislu odredbe člana 102 stav 8 Zakona o stečaju, donio odluku o otvaranju i zaključenju stečajnog postupka, na način određen u izreci rješenja.

Temeljem odredbe člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreskoj upravi FBIH i Upravi za indirektno oporezivanje BiH.

Nadalje, temeljem odredbe člana 204 stav 1 i 3 Zakona o stečaju, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda,

Službenim novinama F BiH te dostaviti FIA, dok je odredbom člana 204 stav 2 istog zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama F BiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Temeljem odredbe člana 102 stav 8 Zakona o stečaju sud je odlučio kao u izreci rješenja.

Stečajni sudija
Vedran Milašinović

POUKA O PRAVU NA IZJAVLJIVANJE PRAVNOG LIJEKA:

Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 dana, od dana objavljivanja rješenja u Službenim novinama.